



Na osnovu čl. 7. i 8. Zakona o ministarskim, vladinim i drugim imenovanjima („Službene novine Federacije BiH“, br. 12/03, 34/03 i 65/13), člana 64. stav 7. Zakona o zdravstvenoj zaštiti („Službene novine Federacije BiH“, br. 46/10 i 75/13) i tačke V Odluke o kriterijima za nominiranje/imenovanje predsjednika i članova upravnih odbora javnih zdravstvenih ustanova čiji je osnivač Kanton Sarajevo („Službene novine Kantona Sarajevo“, br.: 19/12, 12/13 i 17/15), Ministrica zdravstva Kantona Sarajevo, *raspisuje*

## **JAVNI OGLAS**

### **za nominiranje/imenovanje na poziciju predsjednika i članova upravnih odbora javnih zdravstvenih ustanova čiji je osnivač Kanton Sarajevo**

Objavljuje se Javni oglas za nominiranje/imenovanje na poziciju predsjednika i članova upravnih odbora javnih zdravstvenih ustanova čiji je osnivač Kanton Sarajevo, i to:

1. JU Zavod za zdravstvenu zaštitu žena i materinstva Kantona Sarajevo,
2. JU Zavod za medicinu rada Kantona Sarajevo,
3. JU Zavod za javno zdravstvo Kantona Sarajevo,
4. JU Zavod za sportsku medicinu Kantona Sarajevo,
5. JUKS Zavod za zaštitu zdravlja studenata Univerziteta u Sarajevu,
6. JU Zavod za zdravstvenu zaštitu zaposlenika Ministarstva unutrašnjih poslova Kantona Sarajevo i
7. JU Psihijatrijska bolnica Kantona Sarajevo  
(u daljem tekstu: zdravstvene ustanove).

Upravni odbor zdravstvene ustanove čiji je osnivač Kanton Sarajevo, je organ upravljanja zdravstvene ustanove, a shodno članu 64. stav 4. Zakona o zdravstvenoj zaštiti ima pet (5) članova i čine ga predstavnici:

- osnivača – tri (3) člana, od kojih jedan (1) mora biti ispred Ministarstva zdravstva Kantona Sarajevo,
- stručnih radnika zdravstvenih ustanova dva (2) člana, od kojih jedan (1) mora biti iz reda zdravstvenih radnika.

#### **Djelokrug rada upravnog odbora:**

Upravni odbor zdravstvenih ustanova, u smislu člana 65. Zakona o zdravstvenoj zaštiti donosi Statut zdravstvene ustanove, imenuje i razrješava direktora zdravstvene ustanove, utvrđuje planove rada i razvoja i godišnji program rada, donosi finansijski plan i usvaja godišnji obračun, donosi opšti akt o unutrašnjoj organizaciji i sistematizaciji poslova i druge opšte akte u skladu sa zakonom, Statutom i osnivačkim aktom, odlučuje o svim pitanjima obavljanja djelatnosti radi koje je zdravstvena ustanova osnovana, ako zakonom nije određeno da o određenim pitanjima odlučuje drugi organ zdravstvene ustanove, usmjerava, kontroliše i ocjenjuje rad direktora, rješava sva pitanja odnosa sa Osnivačem, odlučuje o korištenju sredstava preko iznosa utvrđenog Statutom zdravstvene ustanove, odgovara Osnivaču za rezultate rada, odlučuje u drugom stepenu o prigovoru radnika na rješenje kojim je drugi organ određen Statutom zdravstvene ustanove odlučio o pravu, obavezi i odgovornosti radnika iz radnog odnosa, podnosi osnivaču najmanje jednom godišnje izvještaj o poslovanju zdravstvene ustanove, te vrši i druge poslove u skladu sa zakonom i Statutom, odnosno osnivačkim aktom ustanove.

Upravni odbor zdravstvene ustanove imenuje Vlada Kantona Sarajevo, na prijedlog Ministricе zdravstva Kantona Sarajevo, na mandatni period od četiri (4) godine.

Kandidati koji se kandiduju na navedene pozicije dužni su ispunjavati slijedeće opće i posebne uvjete:

▪ **Opći uvjeti:**

- da je državljanin Bosne i Hercegovine (dokaz: uvjerenje o državljanstvu ne starije od šest mjeseci);
- da je stariji od 18 godina, a da nije stariji od 65 godina (dokaz: rodni list, ili ovjerena fotokopija rodnog lista ili ovjerena fotokopija lične karte CIPS-a ne starije od šest mjeseci);
- da nije otpušten iz državne službe kao rezultat disciplinske mjere, na bilo kojem nivou u Bosni i Hercegovini (bilo na nivou države ili entiteta) u razdoblju od tri (3) godine prije dana objave upražnjene pozicije (dokaz: izjava kandidata potpisana i ovjerena od strane nadležnog organa);
- da se na njega ne odnosi član IX.1. Ustava Bosne i Hercegovine - da nije pod optužnicom od strane Međunarodnog tribunala za bivšu Jugoslaviju (dokaz: izjava kandidata potpisana i ovjerena od strane nadležnog organa);
- da nije na funkciji u političkoj stranci, u smislu člana 5. Zakona o ministarskim, vladinim i drugim imenovanjima Federacije Bosne i Hercegovine (dokaz: izjava kandidata potpisana i ovjerena od strane nadležnog organa),
- da nije izabrani zvaničnik, nosilac izvršnih funkcija ili savjetnik u smislu Zakona o sukobu interesa u instituciji vlasti Bosne i Hercegovine (“Službeni glasnik BiH”, br. 13/02, 16/02, 14/03, 12/04, 63/08, 18/12 i 87/13), (dokaz: izjava kandidata potpisana i ovjerena od strane nadležnog organa).

▪ **Posebni uvjeti:**

- da ima završen VII (sedmi) stepen stručne spreme i najmanje pet (5) godina radnog iskustva (dokaz: diploma ili uvjerenje o diplomiranju i potvrda o radnom iskustvu);
- da nema privatni – finansijski interes u zdravstvenoj ustanovi u čiji se upravni odbor kandiduje (dokaz: izjava kandidata potpisana i ovjerena od strane nadležnog organa);
- da nije direktor zdravstvene ustanove, a koja ima status pravne osobe (dokaz: izjava kandidata potpisana i ovjerena od strane nadležnog organa) i
- da nije član više od jednog upravnog odnosno nadzornog odbora (dokaz: izjava kandidata potpisana i ovjerena od strane nadležnog organa).

Kandidati su dužni uz prijavu, koja sadrži kraću biografiju, adresu i kontakt telefon, priložiti originalne dokumente ili ovjerene fotokopije, kao dokaz o ispunjavanju općih i posebnih uvjeta traženih ovim oglasom. Ovjerene fotokopije dokumenata ne smiju biti starije od šest (6) mjeseci. U prijavi obavezno navesti da li se kandidat prijavljuje na Javni oglas kao predstavnik osnivača od kojih jedan (1) mora biti ispred Ministarstva zdravstva Kantona Sarajevo, odnosno stručnih radnika zdravstvene ustanove.

Prijave sa traženim dokumentima kao dokazom, se dostavljaju lično ili poštom preporučeno, u zatvorenoj koverti, sa naznakom „PRIJAVA NA JAVNI OGLAS – UPRAVNI ODBOR JAVNE ZDRAVSTVENE USTANOVE (navesti naziv javne zdravstvene ustanove u čiji se upravni odbor kandiduje) ČIJI JE OSNIVAČ KANTON SARAJEVO – NE OTVARAJ”.

Prijave koje ne sadrže propisano iz ovog oglasa, kao i prijave podnesene istekom roka utvrđenog u ovom oglasu, odbacit će se kao nepotpune odnosno neblagovremene, te se kao takve neće uzeti u razmatranje.

Prijave se dostavljaju na slijedeću adresu: Ministarstvo zdravstva Kantona Sarajevo, ul. Reisa Džemaludina Čauševića br. 1, Sarajevo.

Oglas ostaje otvoren 15 dana od posljednjeg objavljivanja ovog oglasa.

Javni oglas će biti objavljen u “Službenim novinama Federacije BiH” i dnevnim novinama „Oslobođenje“ i na web stranici Ministarstva zdravstva Kantona Sarajevo: <http://mz.ks.gov.ba>.

Svi kandidati koji budu stavljeni na listu sa užim izborom, biće pozvani na intervju pred Komisijom za izbor.

Prije intervjua kandidati su dužni dati podatke o ranijim neposrednim rukovodiocima od kojih se mogu dobiti preporuke i informacije.

Kandidati koji žele aplicirati na navedene pozicije u više upravnih odbora, obavezni su da za svaki dostave posebnu prijavu i potrebnu dokumentaciju (originalne dokumente ili ovjerene fotokopije dokumenata ne starije od 6 mjeseci, kao dokaz o ispunjavanju općih i posebnih uvjeta traženih ovim oglasom).

Bilo koji kandidat, odnosno član javnosti može podnijeti prigovor na konačno imenovanje za predsjednika i članove upravnog odbora zdravstvene ustanove, u skladu sa Zakonom o ministarskim, vladinim i drugim imenovanjima Federacije Bosne i Hercegovine.

Nakon završene procedure imenovanja, prijava i dokumentacija se neće vraćati kandidatima koji su aplicirali na ovaj javni oglas.

**MINISTRICA**  
**Prim. dr Emira Tanović-Mikulec s.r.**



web: <http://mz.ks.gov.ba>  
e-mail: [mz@mz.ks.gov.ba](mailto:mz@mz.ks.gov.ba)  
Tel: + 387 (0) 33 562-104, Fax: + 387 (0) 33 562-243  
Sarajevo, Reisa Džemaludina Čauševića 1

